

# INUIT ATAQTIGIIT

## Inatsisartuni



Qaqortoq, 15. august 2017

Inatsisartut suleriaasianni § 37 naapertorlugu Naalakkersuisunut imaattunik apeqquteqarpunga:

- 1. Nunami ikuallannersuaqarnerani kommunit atortutigut sulisutigullu qanoq piareersimatiginersut, Kalaallit Nunaanni annaassiniarnissamut upalungaarsimaneq aamma ikuallattoornissamik qaartoornissamillu pitsaaliuinermi iliuusissat pillugit Inatsisartut inatsisaat nr. 14, 26. maj 2010-meersup atuutilernerata kingunerisaanik, Naalakkersuisunik mannamut pineqartunut ilisimasaat nalunaarsorneqarsimappat?**
- 2. Nunami ikuallannersuaqarneranut aningaasatigut nuna tamakkerlugu immikkut piareersimasoqarpa?**
- 3. Ukiuni kingullerni nunap panerneranik pinngortitami ilaatigut piniariartarfiusuni ikuallannerit annertusiartorlutillu akulikilliartorput . Tamannalu ilaatigut kommuunit ilaani qatseriniarneq imermik assartuinissaq qanittumilu erngup aqutaanik maqitsiviusinnaasumik pilersitsisoqarsimannginnera patsisigalugu qatserigasuartoqarsinnaanani. Tamanna siunissami sillimaffiginiarlugu Naalakkersuisut kommuunit peqatigalugit avinngarusimasunik qatserinissamut erngup aqutaani qatserinermi imermik maqitsivissat pilersiortoqarnissaanut ikiuutissallutik pilersaaruteqarpat?**
- 4. Kalaallit Nunaanni annaassiniarnissamut upalungaarsimaneq aamma ikuallattoornissamik qaartoornissamillu pitsaaliuinermi iliuusissat pillugit Inatsisartut inatsisaat nr. 14, 26. maj 2010-meersumi tunngavigalugu Naalakkersuisut immikkut ittumik maleruagassanik suliaqarnissaminnut pilersaarusiorsinnaappat?**

(Inatsisartuni ilaasortaq Kelly Berthelsen, Inuit Ataqatigiit)

### **Tunngavilersuut:**

Pinngortitaq ukiuni makkunani allanngoriartorpoq, ilaatigullu piffinni assigiinngitsuni panernersuaqartarnera takornartaajunnaarpoq. Panernersuaqartarneratalu kingunerisaanik nuna annertuumik ikuallattalermat upalungaarsimanissaq, soorlu atortutigut aammalu aningaasatigut, pingaartumillu akisussaaffitsigut erseqqissumik qulaajarneqarnissaa pisariaqarsorinartooq, Nassuttuup eqqaani ikuallannersuaqarnerata takutippaa.

Ullut qulit suliffiusut qaangiutsinnagit akineqarnissara kissaatigaara.